

#إسمعوا\_من\_المسيحيين\_متسمعوش\_عنهم (٧)

لو المسيح هو الله زي ما بتقولوا، مين كان بيدير الكون لما المسيح كان على الأرض؟

السؤال ده مشروع وشائع، بس إجابته بسيطة جدًا ..

تخيّل معايا الأسئلة والأمثلة دي:

لما ملايين الناس بيصلُّوا في نفس الوقت ..

إزاي الله بيستمعهم كلُّهم؟ ومين بيدير الكون وقت ما بيستمعهم؟

لما الله سُبحانه كان بيكلِّم موسى كلِّيم الله من النار (طه ١١-١٢) ..

مين كان بيدير الكون في الوقت ده؟

اللي بيسأل الأسئلة دي، بينسى ان الله مش محدود بزمان أو مكان ..

الله بيسمعني وانا بصليّ، وفي نفس الوقت بيدير الكون ..

الله بيكلِّم موسى في الأرض، وفي نفس الوقت بيدير الكون ..

الله بيعمل كل حاجة طول الوقت، في أي حثّة، بكل طريقة ..

المسيح قال لرجُل دين يهودي مشهور إسمه نيقوديموس ..

إنه (يعني المسيح) نزل من السّما، وهو بردو في السّما ..

وهيصعد تاني للسّما (الإنجيل بحسب يوحنا ٣:١٣) ..

يعني المسيح قبل ما ييجي للأرض، كان في السّما ونزل منها ..

والمسيح وهو في الأرض، هو بردو في السّما ..

وبعد الموت والقيامة (البعث)، هيصعد تاني للسّما!

وطبعًا غني عن البيان إن الصعود والنزول ..

تعبيرات بتقرّب المعنى للإنسان ليس إلا.

يعني إجابة سؤال: مين كان بيدير الكون لما المسيح كان على الأرض؟

هو المسيح بردو.

السؤال الأصعب واللي هجاوبه البوست الجاي:

لو المسيح هو الله زي ما بتقولوا ..

إزاي تكفروا وتدّعوا إنه مات على الصليب؟